

# 1 Chininri Kpashiri Petro Kirukate

## *Galuklewlu*

<sup>1</sup> Petro, Geso Kristo yokanatanru kirukatni. Tsomitkalune, pnu gajene chinanupni, gipalatachine Pontochijneya, Kalasichijneya, Kapatosichijneya, Gasyaya, ga wa Witiniya. <sup>2</sup> Tsomitkalungi wa muchikawako rumatagnaputyawaka Goyakalu Girchi. Giwekikaluru chinanu kpashirine gixaakalungi, yijnakotachine gixinripa ga wa Geso Kristograda gitslaptagatkalune gixinripa. Gixa chinanu ruxolewnanu gimutlewlus ga wa giclewanshinikanrewlu.

## *Wkagwaklewle giwekachrini*

<sup>3</sup> Gimalwutkalurni Goyakalu, Wutsrukate Geso Kristo Giru. Wa tsru potu retwamonrewle chinanu, rumepe gishpaakakletnakwu. Kagwaklewlu giwekachri waneywu wixinripa Geso Kristo yotunre chinanu gipnachinet-skalaya. <sup>4</sup> Gyoptotanrupa waneyapgi mpojpakatupni ga wa mumtutewnakatupni ga wa mpochipukatupni, tengogne gimretikaluru gixanupa. <sup>5</sup> Gixni wa Goyakalu giyaklewle gimretikalungi galixlewuya gognewatikaluru chinanupa. Walenwa galpokotkalurutkani gipgujetkalurupa ralipregognepa. <sup>6</sup> Wale chinanu gimuwpotuta. Pshinitsonuji nsalewnamka pnumnu gixachri gyantaletikolkakaya, wa

galuukalurupmakni wane gixa salewnaletinri, seyni gimuwpotutachingi. <sup>7</sup> Kiglerpotni yantaletikolu galixlewle kori pnu. Xirnachrimka tetumgikni korni, seyni tsalewnana. Wanepnute kiglepotlu yantaletikolu galixlewle, retikolupa gimalwuru chinanupa ga wa galixkowlu chinanupa ga wa kagwakpiiru chinanupa wa Geso Kristo gipgujewnini. <sup>8</sup> Gma metanutu Wale gixa gishinika. Ga wa xawakni gi getawalu, seyni galixinri, gimuwpotuta, gimuwleyma mumkata chinkotu ga wa gatajiwnachri. <sup>9</sup> Galixle yoptukyawaka yoptotachingi. Tyenwa giwekinri gognetkakikolu.

*Tokanchi geneklewatachine gipgujtalewle*

<sup>10</sup> Tye gognewatikaluru repomsapiranyemputna tokanchi geneklewatachine, ga wa rujga gimatleyempotutluna. Wannanwa tokanchi geneklewjeta wa gixa gimusutikolupapirana. <sup>11</sup> Rujgapiranyegitluna klunerupni ga wa gi pixkagognepu runkakletpiranatanru Giwekikaluru Kristonu wanna gwachri. Wa ma mapookanuwa rupgujtagnaputanru Kristo salewnalepapirana ga wa royaknupirana gomkagitachripa. <sup>12</sup> Wanna gipgujetyegitka gi wannako chinanukni seyni gixa chinanupni tyepirankaka kamrurewatyana. Ga wa xani tyepirankaka ginkaaka gixa wa Kiglerpotunaru Tokanchi ginkakjeneya, wa Giwekikaluru Kpashiri tengogne yokanatikaluru ginkaklewatyachinni. Tyepirankaka gogaluklewlu rixna Goyakalutowrerune tengogneya retyapluna.

*Kpashirinepgi galpokonshinikanutinwa*

<sup>13</sup> Giyagni galpokonshinikanutinwa. Kanshinikanurunepgi. Psolpotuyako gkagwaklewatanu gimutlewl u chinanu wa gixa gimutikolupa wa Geso Kristo gipgujewnnipa.  
<sup>14</sup> Wgenchine kajnakolune pixkalunepgi. Gi wa muchinanu getsotanrewle wa gma mumatkanuwa gixanatini, gixachinpatkagi.  
<sup>15</sup> Seyni kpashirni ntomgajeru pixka, gixa koxa kpashirinepgi psoluyako gixjetyawakaya.  
<sup>16</sup> Wane chinyongatyawaka:

*Kpashirinepgi gi rixanu kpashirno Gita.*

<sup>17</sup> Ga wa Girchi gi wa manewle giglenu chinanu yoptotlu yineru, seyni satkaka yineru rutakyagoka rixpoko kamruretyawaka. Giyagni gixa wa Girchi koschekgiwakatachingi, pikachinepgi gewi gwanatkakopshini, gi rixanu payinechijne gwanatachingi galikaka.  
<sup>18</sup> Gike gapri migje gixjetyawaka gishpakya, wa gitsrukateni gike gapri migje giykole chinyawaka. Gimata, gixa gi wa pojpakalkakaya sroschi ga wa kori pixka wenutkalurni gishpakinri. <sup>19</sup> Seyni Kristograda kwenuru potu wenutika, mapchotu powralu potu gowega wgenegraga pixka. <sup>20</sup> Goyakalu gimatagnapunatatkalu Kristogrdragapirana ma kamrutkonuwa tye psolchijneko, seyni ralipregognekaka rupgujetatkalu gixa chinanu. <sup>21</sup> Kristo chinanu gixa galixlu wa gipnachinetskalaya yotunkakjeru, wa royaknu renekjeru, Goyakalu, wa Goyakalu galixinripa ga wa Wale chinanu gkagwaklewatinripa.

*Gimepe gishpakletachinetkagi Goyakalu*

*tokanuya*

<sup>22</sup> Xani kpashirinshinikanune gixatka wa galikakpotunaru tokanchi galixkalchinanu. Giyagni mixashatkanepgi gixa gishinikletayapna moletkakachine. Gishiniikakpotutanu gajiya. <sup>23</sup> Gixa gimepe gishpakletachinetkagi Goyakalu tokanuya, wa kigleru kajiruji pixkalutuya. Gi wa pojpakalu kajirujiya gimepe gishpaka, seyni mpojpakajituya, Goyakalu tokanuya, wa giwekgognenatachri Tokanchiya ga wa gwagognenatachri Tokanchi. <sup>24</sup> Gi rixanu:

*Pejnurmaneko kshana pixkalutni,*

*Rupriga kshana ga wa gigwu gjiruka.*

<sup>25</sup> *Seyni Gitsrukaachi tokanu gwagognenatachri.*

Tyenwa kiglerpotunaru tokanchi gixyegiya ginkakletikaluru.

**2***Gajerya gishpakachine pixka*

<sup>1</sup> Giyagni giknokanru pejnuruko gektutu, ga wa pejnuruko yokwiri, ga wa gixashlewlu, ga wa ganxalu, ga wa pejnuruko gapatlewlukaka.

<sup>2</sup> Gajerya gishpakachine pixka galukpotutanru tnuchga makojetu. Walenwa tokanchi. Waleya ntseruwninripa gognewatikaluru chinanu,

<sup>3</sup> wa gixa gimatinikalu kshinikanuru rixinri Git-srukaachi.

*Sotlu giwekachri*

<sup>4</sup> Walenwa gyayegitanru. Sotlu giwekachri pixka rixa Wale, giknookaluru galikaka yineya, seyni Goyakalu tsomitanruni. Kiglepotni.

**5** Ga wa gixa sotlu giwekachrikaka pixkalungi kamrutikaluru panchi, Giwekikalurupji gixinripa. Sasertotene kpashirinemkojepgi, ganika genekashletinripa Giwekikaluruya wa Goyakalu gigleretyawaka Geso Kristo chinanu.

**6** Giyagni Walepirana chinyongatyawaka:

*Syo Magkate nutaklu yoptowaka gwachri sotlu,*

*Tsomitkaluru ga wa kigleru potu.*

*Wale galixachripa gi wa patetko.*

**7** Giyagni gixa galixachingi chinanu kagwakpi-ratkalurni. Ga wa malixkane chinanu Walenwa:  
*Wa sotlu myoptotkotu kamrupjitachineya,*

*Wale gitaka yoptowaka gitsejita.*

**8** *Sotlu gitspetkaluru, sotlu gjrukikwaka.*

*Rutakikowakna rutsptyana*  
ma malixkalchinanruna tokanchi.

### *Goyakalu gayinerutenetkagi*

**9** Seyni gixa tsominerutkalungi. Saser-totenemkojgi. Pogirewatychingi. Yine kpashiringi, Goyakalu gayineruteneko, ruglenu ginkakletinripa. Walenwa mapshagwakayegiya ntomgajeru, Wale pokamlale koglajru gwinripa.

**10** Gixa muchikawa gi wa yinenangi. Ga wa xawakni Goyakalu gayinerutenetkagi. Metwamonunatkongi, ga wa xawakni getwamonutkalunetkagi.

### *Gitspalatinri manchi getsutanrewlekaka*

**11** Nushinikanune, gita gagjitgi pu gwachine gixinri ga wa payinetskala gwakopshini, gitspalatinri manchi getsutanrewlekaka. Tyenwa gi-maletlu gixa giwekle gerotu. **12** Kigleru gixjetanu

payineyegiya wa jigyeginipgina gektutu kamrulerune pixkamka, Goyakalu gimalwutkalurupni kigleru gkamrure retkalna chinanupni wa Goyakalu kayegikinrigognepa.

### *Goyakalu wayegrenepgi*

<sup>13</sup> Pejnuruko yine tsru gitakanru gyijnakotanu Gitsrukaachi chinanu, <sup>14</sup> waka pogirchiko, wa tsru potu rixinri, waka girukotlewatachine wa pogirchi yokanatanune gektutu kamrutachine saletachinepa, ga wa kigleru kamrutachine galixkotachinepa. <sup>15</sup> Gi rixanu tyenwa Goyakalu gishinikanru, wa kigleru gkamrutinriya, gkochrokayaplu manshinikanune yine mumatkalene. <sup>16</sup> Gishpakachine pixkalunepgi, seyni wa gishpaklu gi wa gektutkaka gishyale gitakanru. Seyni Goyakalu wayegrenepgi. <sup>17</sup> Pejnuruneko gkagwakpiratanu. Gishinikanna moletkakachine. Mpikanru Goyakalu. Gkagwakpiratanru pogirchi.

### *Kristo salewnale gyimanrupa*

<sup>18</sup> Gipxaklewatachine, psolpikleyako gyijnakotanna gitsrukaten. Gi wa kiglerunepjepni ga wa mayogone, seyni koxa mpotukane gyijnakotanu. <sup>19</sup> Gi rixanu tyenwa poyagnutikolu, wa satu muklukanuwnanshinikanutkatu rixinripa Goyakalu getanuya, salewakchi rakotanshinikanutinipa, gi wa salewakchi gimuknu rixinri. <sup>20</sup> Gi rixanu Ɂkluneruya galixkotko wa gmukochirewatinipla ga wa gichko getikoklunu, gakotanshinikanutiniplu? Seyni kigleru gkamrutinipa ga wa nsalewinri, wa gakotanshinikanutiniplu, tyenwa poyagnutikolu

Goyakalu getanuya. <sup>21</sup> Gi rixanu tye chinanukni ntomgaka. Gi rixanu Kristo koxa salewna gixa chinanu. Gyimanru ruknokamtyagi, wa gixa gomkaagapotyaplu.

<sup>22</sup> *Gi wa mukochri kamruta Wale.*

*Gi koxa yokwiri tokanu rukshikiko Wale.*

<sup>23</sup> Wa yangakoklunu, gi wa rugje yangalewleta. Wa salewnanatini gi wa kawgurewata. Seyni kgitakyagoklewakleru poyagkakachri yegi Walenanuko samyoknawa. <sup>24</sup> Koroshishkitaya Waleko ganikmukchiretwu gimaneya, wa wixa gipnachine pixka wixatka, wma mukochirewatinitpatka, poyagkakachinepwu wuwekinriya. Walepchole chinanu gixa gitskalaaka. <sup>25</sup> Gi rixanu gixni wa gowegane pixka gixa pupjerenatachingi. Seyni wa xani girukotapratachri yegi nsatkaaka, wa girukotanshinikanutjeru yegi.

### 3

#### *Kashimyokakachine gimkata kamruretanru*

<sup>1</sup> Ga wa gixa gnunrochine waneko pixka gixanu. Gyijnakotanna ganurune. Wa tokanchi ma malixinipna pimrine, Geso yegi raniikona tokanchimigjeya wa ganunro gixjetyawaka chinanu. <sup>2</sup> Retjetingina gixjetyawaka powralu gkagwakpiireymananuko. <sup>3</sup> Gi wa gixa giglewlepni wa rogo gwachri giglewle, gi wa kamaprujiwutsaya, gi wa kori giglewleyako, gi wa kigleru makatlewlu yako. <sup>4</sup> Seyni gixa gaji yogimatachri yineru giglewle, giglewlu mpojpakatupa. Walenwa shinikanchi mayogotu

ga wa pochkeru. Kwenurpotni Goyakalu getanuya.<sup>5</sup> Gi rixanu muchikawa wane rixa gigletletnawana wa kpashirone suxone, Goyakalu kagwakanshinikanutyachrone. Wannako ganurna yijnakotachinni.<sup>6</sup> Sarni pixka tyijnakotlu Gawrani. Wane chinru gitsrukaachi. Gixni wa toklopishangi, wa kigleru gixini ga wa gi satuna pikikolu gimyekini.

<sup>7</sup> Ga wa gixa gnurchine waneko pixka gixanu. Ganunrone gwayegitanu gimatkalewleya. Gk-agwakpiratanna ganunrone mshikostonoto potu pixka, giweklu genekashluru giyoptotkakachingi pixka. Wa gagjigognerepa ma mumalletikotupa.

*Gkatjitanru gektutu. Kigleru gkamrutanu.*

<sup>8</sup> Ga wa raliprepatka, pejnurunekgi gixa panshinikanurunepgi. Kgetwamonrerunepgi. Gishinikmoletachinepgi. Kshinikanurunepgi. Mturune gitaknawachinepgi.<sup>9</sup> Gi wa gapnutanru gektutu gixeru gektutuya. Gi koxa yangalu gapnutinri yangaluya, seyni gagjiyegitangonukna ruglenshnikanyegitimolupna. Wale chinanuko ntomgaka, wa gixa yoptotyaplu giglenshnikanye-glewlu.<sup>10</sup> *Gi rixanu*

*Girukokta gishiniklu ruwekinri*

*ga wa kigleru gogi retle,  
rutuukakanru gektutu yanumsale,  
yokwiri ma koschekinitipa.*

*11 Katjitanru gektutu. Kigleru kamrutanu.*

*Rujganru gglewanshinikanrewlu  
ga wa romkagitanru.*

*12 Gi rixanu Gitsrukaachiygale  
getjetna poyagkakachine,*

*ga wa gijnakopna yijnako gagjigogneretna.  
Seyni Gitsrukaachi satkakna gektutu kamruk-  
lerune.*

*Poyagkaklewlu chinanu nsalewnanu*

<sup>13</sup> ¿Katu gektutetangi wa kigleru jmererune potu gixinipa? <sup>14</sup> Seyni poyagkaklewlu chinanu nsalewninipa, giglenshnikanyegitkalungi. Gi wa mpikanna nsaletjene. Gi wa kojwakan-shinikanutkalunepgi.

<sup>15</sup> Seyni gajiya gipashichanru Gitsrukaachi Kristo. Galpokgognenatachinepgi ginkakyapna pejnuruneko gepomgajenepa gkagwaklepirana, wa klu chinanu waneygi gkagwaklewle. <sup>16</sup> Gi wa kayogolunepgi, seyni mpikleyma wane gixanu, muklukanuwannashinikanutkanepgi, wa gjigyegitkoklunupa patetkona, kigleru gixjetyawaka Kristoya jigyeglewashatachine.

<sup>17</sup> Gi rixanu Goyakalu gishinikiniplu gixa salewninripa, kigleru kamruklerune nsalewninipa galuukalurni wa gektutu kamruklerune nsalewninipmaka pnute. <sup>18</sup> Gi rixanu pakatapje salewnapa Kristo mukochri chinanu. Poyagkakachri salewna mpoy-agkaakane chinanu, Goyakalu yegi ranikyapwu. Gimane ruylatika, ga wa Giwekikaluru ruweekakika. <sup>19</sup> Giwekikalurkoxaya Kristo yayegitna giwekikalurune yoshmaakalune. Runkaklewyentapna. <sup>20</sup> Muchikawa nyi giwekikalurune malixkanenanni Noweklu, Goyakalu gakotanshnikanrewata kagwakinikopshini, wa tsro pumlu kamrutkakopshini. Walaya gi gixna, walenwa yokgipi yinerupje,

gognetkaaka gonuya. <sup>21</sup> Gixa chinanu katilewluni wa gognewatikolu yaglu. Gi wa gimanepcho giknokikolu gognetkakgi, seyni ginshinikanuyna kigle gigle gixinri Goyakalu, Geso yotunotinri chinanu wa gipnachinetskalaya. <sup>22</sup> Wa Wale tengogne yachritka. Goyakalu potuklesretate rawa. Goyakalutowrene ga wa tsru gitaaikalune, ga wa gichkolune yijnakotlu.

## 4

### *Goyakalu gixyawaka pixka giwekanu Giwekikaluruya*

<sup>1</sup> Giyagni gi rixanu Kristo salewna gimaneya, gixa koxa galpokotinwa waleko shinikanchiya. Gi rixanu salewnamanetachri gituka mukochirewleta. <sup>2</sup> Giyagni xaniyakawa gipejnukta walapu giwekinripachi, gi wa yine getsotanrewlekaka kamrutachinepgi, seyni Goyakalu gishinikiyawaka kamrutachinepatkagi.

<sup>3</sup> Gi rixanu gigiyatka giknogachrigogneni payine galukyawaakaka wane gixinripa, ga wa mpogijpatnuchkaka gyinripa, ga wa getsotanrewlukakaya, ga wa gimruya, ga wa tsru nikluyegiya, ga wa gogiirewluya, ga wa gianshichkaluru yagluchisha yonogyegitikoluya.

<sup>4</sup> Ruglajityaluna wa gixa gi wannayma gasukjeta waleko seprolokchi potu yegi. Kapataklerunni.

<sup>5</sup> Seyni runkakyegitinwana wanna Goyakalu yegi. Galpokotachri Wale rutakyagokyapna giwekachine ga wa gipnachinne. <sup>6</sup> Gi rixanu tye chinanukni wa gipnachinni yegi runkakletika Kiglerpotunanu Tokanchi. Yine gixjetyawaka

pixka ruklukanuwnayegjixikolupna manchiya, seyni Goyakalu gixyawaka pixka ruwekinripna Giwekikaluruya.

*Goyakalu gimutlewie girukotachine kiglerune pixkalunepgi*

<sup>7</sup> Ptowrunanuka yoptukyawakapa kayegikatka. Giyagni kanshinikanurunepgi. Ggirukotinwa gagjigognetinripa. <sup>8</sup> Pejnuru pnuute gishiniikakpotutanu. Gi rixanu gishiniklewlu gishyatlu gixoluru potu mukochri. <sup>9</sup> Gislagkakini mkegemgakanepgi. <sup>10</sup> Satkakgi gixa gixa yoptoletyawaklu Goyakalu genekashatyagi, waleya gipxakinna pimrine. Goyakalu gimutlewie pnumnu gixachrikaka girukotachine pixkalunepgi. <sup>11</sup> Wa satu yanumsatini, Goyakalu tokanu pixka rixa yanumsaletanu. Ga wa satu kamrurewatini, wane rixanu muchkonuyma pixka wa Goyakalu genekpotutanru. Psoluyako rumalwutikolupa Goyakalu, Geso Kristo chinanu. Walenni goyaknu gwagognenatachri ga wa muchkonu gwagognenatachri gike rixiniko mnikawnakatupa. Wane gixkalurupa.

*Kristonune pixkalune nsalewninri*

<sup>12</sup> Nushinikanune, gi giglajyegitanru wa xirnachri pixkalutu gyantaletikolu, wa pagixanu metjejetkotu giknogjermaka pixka. <sup>13</sup> Seyni gimuwatanu wa wane gixa gimumatletlu Kristo salewninri. Wa rupgujewnnipa Wale goyaknu, gixa gimuwatinripa gimjikachinpotpupgi. <sup>14</sup> Wa Kristo giwaka chinanu gyangikoklunupa giglenshnikanyegitkalungi. Gi rixanu gixa yegi rawa Goyakalu goyaknu ga wa

Giwekikaluru Walenu. <sup>15</sup> Wale chinanu gi satuna gixa kgiyialewakleru rixinri salewnachripni, gi wa kachowguruko rixinri, gi wa gektutu kamrukleruko rixinri, gi wa kyimaklewakleru yoshmakashatnachriwako rixinri. <sup>16</sup> Seyni Kristonune gixkalchinanu nsaleewnini, gi wa mpatewatanu, seyni tye giwakaya gimalwukakinri Goyakalu. <sup>17</sup> Gi rixanu rapokatka gipapko wa Goyakalupjiya yinuwakinripa gitakyagoklewl. Ga wa wixa yegi yinuwakini *¿gi rixpokotanu yoptukyawakapna wa Kiglerpotunanu Tokanchi Goyakalupirana malixaklene?*

<sup>18</sup> Ga wa *ramgakastsimkatkani poyagkakachri* *¿gi rixpokotanu mupashiregotu ga wa kmukochireru?*

<sup>19</sup> Goyakalni wa giyakotachri galixkalurupa. Giyagni Wale galukyawaka salewniyachine ruwekinrina raponshinikanegitanrunga, ga wa romkagi kigleru kamrujetinripna.

## 5

### *Goglupratanru Goyakalu rowegatene mkoje*

<sup>1</sup> Giyagni nagjitgi gixa tsruni, gixje tsrutsolejkoxno gita ga wa Kristo salewninri gipgujtatachrino, ga wa gipgujetkalurupa royaknu gapiikalurupno. <sup>2</sup> Goglupratanru Goyakalu rowegatene mkoje wa gixa yegi gwachine, gi wa gerutkalunepgi seyni gixa ko ginshinikanuya wa Goyakalu galukyawaka. Gi wa tyechijne gajerkaka gjigachineepgi, seyni jmererunepgi. <sup>3</sup> Wa gixa gitakyegitkalune chinanu, gi wa gitsrukatiyegitanna, seyni

gowegane yimanunepgi.<sup>4</sup> Ga wa rupgujewnninipa wa Girukotapratachri Gitsrukate potu, gixa yoptotanru pogirewlu sageyeta mpochipukatupni.

<sup>5</sup> Waneko pixka gixanu gixa, makluingi. Gyijnakotanna tsrune. Pejnuruneko gixkakluko mturune gitakinwa. Gi rixanu

*Goyakalu satkakna galixkotnachinwa.*

*Rumutna mturune gitaknachinwa.*

### *Goyakalu girukotna walenune*

<sup>6</sup> Giyagni mturune gitakinwa Goyakalumyompuko, wa gichkomyolu. Wa wale tsru gitakyapgi rapokinipa gipapko. <sup>7</sup> Pejnuruko gkojwakanshinikanutjeru Goyakalu yegi gitakanutka, gi rixanu Wale gishinikyagi.

<sup>8</sup> Kanshinikanurunepgi, ga wa giyokachinepgi. Wa gkamnixjerni kamchi gitsrukate, tsru mgenoklu gigritachri pixkalutu yotaljeta. Rujgalu niklokanrupa. <sup>9</sup> Wale nsatkakanu gichkolunepgi galixlewluya. Gimatlwaleko salewakchi rutakyegitkana tyechijne gajene gimolene.

<sup>10</sup> Wa pejnuruko gimutlewlu Goyakalute, wa ntomgajeru royaknu gike rixiniko mnikawnakatu yegi gixinripa Kristo chinanu, wa pshinitsonu nsalewinitka mmagatikane rixkakangi. Poyegitangi. Muchkotanshinikanutangi. Shikowaka rutakangi. <sup>11</sup> Walenni wa giyaklu gwagognenatachripa gike rixiniko mnikawnakatu. Wane gixkalurupa.

### *Ralipre galukleta*

<sup>12</sup> Surwanoya ptsotsotaaji nyonyegitgi. Walenwa wumole poyagkakachri wa gita goya. Gita giykolewata ga wa nupgujtatlu tyenwa

galikakpotunanu Goyakalu gimutlewle wa  
mpoyentunwaletyawaka.

<sup>13</sup> Wawiloni gajero, wa gixaymananuko  
tsomitkaluro, galukgi. Ga wa noturu Marko  
galukgi. <sup>14</sup> Galuukakanu gishiniklewlu  
gamluruyma.

Giglewanshinikankaakalunepgi pejnurunekgi  
gixa Kristo gwachingi.

## **Gerotu Tokanchi Gipiratkaluru New Testament in Yine**

copyright © 2008 Wycliffe Bible Translators, Inc.

Language: Yine

Translation by: Wycliffe Bible Translators, Inc.

Yine [pib], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Yine

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
5c761e81-2e6f-5161-be9d-dbc456a2816b